

Kontuola

ANTZUOLA / Egubakoitza / 2003eko ekainaren 13a / 161. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Bihar, zapatua, hartuko du Zabalo alkate kargua osoko bilkura berezian

AINTZANE IRIZAR

Zapatuan osoko bilkura berezia egingo dute, zinegotziek euren kargua har dezaten eta alkatea izenda dezaten. Bilkura horri begira, Gertu Gae plataformak prentsaurrekoa egin zuen martitzenean, eta kargua hartzera joango direla iragarri zuen.

Bihar, zapatua, egingo dute hauteskunde ondorengo lehendabiziko osoko bilkura; hantxe, aukeratuak izan diren zinegotziek kargua hartuko dute eta alkate berria izendatuko dute.

Hauteskundeok bereziak izan dira, eta osoko bilkura ere ez da ohikoa izango. Izan ere, auzitegiek ez diote laga Gertu Gae plataformari hauteskundeetan parte hartzen. Hala ere, 427 boto jaso dituzte, botoen %33, hain zuzen ere. Parte hartzen laga izan baliote, hiru zinegotzi lortuko zituzkeen hauteskundeetan.

Zerrendako lehendabiziko hiru hautagaiek, hain zuzen ere, egin zuten prentsaurrekoa.

Eguenean, bestalde, EAJ eta EA alderdietako eta Gertu Gae plataformako kideak batzarra egitekoak ziren zapatuko osoko bilkurari begira.



Zapatuan zinegotzi kargua hartzera joango direla iragarri zuten Gertu Gae plataformako kideek.

GERTU GAE-KOAK KARGUA HARTZERA Martitzeneko prentsaurrekoan azaldu zuten, bihar, udaletxera joango dira, zinegotzi kargua hartzera. Honakoa adierazi zuten plataformako kideek: "Herritarrek aukeratu gaituztenez, hautatu bezala aurkeztuko gara, gure

ordezkaritza eraginkorra izan dadin; hauteskundeak demokratikoak izan ez diren arren, herritarren hitza errespetatu eta betiko era demokratikoan eta parte-hartzailean osatzea Udala aldarrikatzen dugu". EAJ-EA koalizioari ere eskaera zehatza

egin diote: "Espainiako legedia medio lortu dituzten seigarren, zazpigarren eta zortzigarren zinegotziek kargua ez hartzea edo berehala dimititzea proposatzen diegu, Gertu Gaeren ordezkariak proportzionala ahalbideratzeko aukera izan dezagun".

HERRITARREN HITZA / Alaitz Jauregi • Langilea

Azkenian, tontuak geu

La caja tonta deitu izen jako betidanik, baina ni konbenziduta nago, tonto bakarrak geu gala, dan-danok jausten galako modurik mozo-luenian. Egixa esateko, beti gae telebistari begira eta beti kritikatzeko "ezebe eztagolako", zeinek ententitzen dau? "Nik notiziak bakarrik ikusten ditudut". Notiziak? Espainia aldia hartuko dogu adibidetzat (errezena berakin sartzia dalako). Lehenengo desastria Prestige izan zan, alde danetan haura komentatzen, baina Egunkarixan itxieriak aurrekoa solizionauta geratu

zan; Irakeko gerriakin, berriz, ordurarteko guztia ahaztu zan. Hori bai, onena zentzu bariko gerra honi jarri zotzen izena: "Guerra a Saddam", oso ona!!!, ez nekixen nik parian tokau ziran emakume, gizonezko, zahar, gazte eta haur danak Saddam deitzen zienik!!!! Lotsarik bez.

Notiziek ez badabe penia merezi, benga danok animalien reportajiak tragatzera.



"Beti telebistari begira eta beti kritikatzeko"

Egun bat bai, bi be bai, baina lehen etxia animaliz beteta, eta 2 hilabete besterik ikusteke.... Zaping egitten hasi biharko ga anuziua bakarrik ikusteke!!! Hori bai, "edozein duda daukanak konsultau leikioke bere farmazeutikuari". Ya esta, badakitt, diru pixkat irabazte aldera 200.000 kamara dauzkan etxe baten sartuko naiz, edo hotel baten, edo basetxe baten.

Ez, ez, onena irla batera jun, gose pixkat pasau, eta eskeleto bat bihurtzen naizenian "Noche de fiesta" ta holako programa konplikauak presentatzeko aurkeztuko naiz. Ikusten? Gainera, Operación bikini egin biharrik ez. Diru horrekin urte pila baten biziko naiz, eta jubilau orduko dana gastautu eukiko dotenez, Goenkaler sartuko naiz M^a Luisakin beste danegaittik geizki esatera. Bide batez, "Siete vidas"era publiko bezela jungo naiz ordubetez sekulako barre algarak botatzera. Eztao barre itxia moduko terapia honik eta.

LABUR

Laster botako dute maristena izandako eraikina

Aspaldi egin zuen Udalak lehenengo maristena eta gero Guraso Elkartarena izandako eraikina botatzeko proiektua, baina, bazegoen arazo bat: Iberdrolaren kable batzuk pasatzen dira eraikinetik, eta enpresa horrek eragozpenak jarri zituen kableok kentzeko. Azkenean, konponbidea topatu dute Udalak eta Iberdrolak. Datorren asterako kable horiek kenduta izango ditu Iberdrolak, eta behin hori eginda, laster eraitsiko dute eraikina.

Erretiratuendako hitzaldia egingo dute hilaren 17an

Datorren martitzenean, ekainak 17, borondatezko lanaren gaineko hitzaldia egingo dute, 18:00etan, Olaran etxean.

Nagusilan elkarteko Juan Mari Garitanok egingo du hitzaldi hori. Beharra dutenei laguntzeko borondatezko lana egiten dutenen elkarte da Nagusilan, eta elkarteko presidentea da Garitano.

Oraingo hilean egiten duten bigarren hitzaldia da. Aurretik, gazte mantentzeko aholkuak jaso zituzten Bereziartua medikuaren eskutik.

Gazte mailako futbol taldea ez da mailaz igo

Esku-eskura izan du gazte mailako futbol taldeak lehen mailara igotzeko aukera, baina azkeneko momentuan galdu egin du aukera hori. Hain zuzen ere, aurreko asteko domekan izan zuten denboraldiko azkeneko partidua. Irunen, Behobia taldearen aurka, eta 3-2 galdu zuten. Partidua irabazi beharra zuten antzularrek bigarren mailatik lehenengora igotzeko. Astebete lehenago, 4-3 irabazi zioten Behobiari etxean. Estalako futbol zelaietan.



ARTXIBOA

12:30ean eta 17:30ean dantza saioa egingo dute Herriko Plazan ume guztiek.

Umeen Dantzari Eguna ospatuko dute herrian etzi, domeka

AINZANE IRIZAR

Oinarin dantza taldeak antolatuta, Umeen Dantzari Eguna ospatuko dute etzi, domeka, Antzuolan. Herri gehienetan urtero izaten den arren egun hori, Antzuolan bi urtean behin izaten da. Goizetik hasita, egitarau zabala antolatu dute umeendako.

Inguruko herrietako 160 bat ume dantzari espero dituzte domekarako Oinarin dantza taldekoek. Bergarako Gazte-Alai, Arrasateko Lore Gazteak eta Txikitxu, Soroluzeko Urrats, Aretxabale-tako Loramendi, Oñatiko Oñatz eta Antzuolako Oinarin taldeetako umeek, hain zuzen ere, hartuko dute parte domekako jaialdian.

Herri gehienetan urtero antolatzen dute Dantzari Eguna, baina Antzuolaren kasuan, bi urte-tik behin ospatzen da egun hori. Izan ere, antolaketa lan handia eskatzen du, eta herri txikia izanik, dantza taldeko kideak ere ez dira beste herrietan adina.

Goizean goiz hasiko dituzte eguneko ekitaldiak; hamarretan, herriko txistulariek kalejira egingo dute. Kalejiraren ondoren, 10:30ean, kanpotik datozen dantzari harrera egingo diete herrikoek, eta 11:15ean, herri osoa kalejiran zeharkatuko dute talde guztiek batera.

Goiz parteko ekitaldi nagusia Herriko Plazan izango da, 12:30ean. Dantza saioa egingo dute talde parte hartzaile guztiek. Saio horren ondoren, umeak herriko hainbat etxetara eramango dituzte, bazkaltzera. Hainbat herritar azaldu da prest kanpotik etorriko diren dantzariak euren etxetan hartzeko.

160 bat ume dantzari etorriko dira domekan inguruko herrietatik

Arratsaldean, berriz, 17:30ean izango da dantza saioa, Herriko Plazan hori ere. Talde bakoitzak dantza berezi bana eskainiko du saio horretan.

EKAINEAN, HAINBAT JAI

Ekainarekin, jaien garai iristen zaigu antzuolarroi. Aurten, gainera, jai batzuk gehiago ditugu; alde batetik, aipatu bezala, Umeen Dantzari Eguna ospatuko dute hilaren 15ean. Bestetik, Ondarreko jaiak ospatuko dituzte, aspaldiko partez. Ekainaren 21erako eta 22rako hainbat ekitaldi antolatu dituzte auzotarrek, Gorpuzti-eguna ospatzeko.

Uzarragan, bestalde, San Joan jaiak ospatuko dituzte. Hilaren 22an, domeka, meza izango dute eta ondoren, dantza saioa.

San Joan bezperan, berriz, Herriko Plazan egingo dute ospakizuna: arbola jasotzea eta dantza saioa, besteak beste.

Ekainean herrian egingo diren jaiekin bukatzeko, San Pedro jaien txanda iritsiko da. Ekainaren 27tik 29ra ospatuko dituzte jaiok, Kalebarrenen.

KIROLA

Garitano, hirugarren zapatuko triatloian

AINZANE IRIZAR

Lan bikaina egin zuen Julen Garitano triatleta antzuolarrak aurreko zapatuan; hirugarren postuan sailkatu zen Debagoieneko triatloi lasterketan. Hura izan zen lasterketa horretan Antzuolako ordezkari bakarra, baina ez da herriko triatleta bakarra.

Zapatuko lasterkari guztiek aurkari gogor bat izan zuten aurrez aurre: beroa. Goizean goizetik izugarriko beroa egin zuen, eta lasterketa hasi zenerako, are eta handiagoa zen beroa. Lasterkari bat baino gehiago larri ibili zen froga amaitzeko.

Julen Garitanok, baina, lan bikaina egin zuen; hirugarren postuan sailkatu zen. Bi ordu, zortzi minutu eta 52 segundoko denbora behar izan zuen lasterketa amaitzeko.

Urkuluko urtegian hasi zuten lasterketa; kilometro eta erdi ige-

rian egin behar izan zuten hantxe. Gero, bizikleta hartu eta 40 kilometroko ibilbidea egin zuten, eta bukatzeko, hamar kilometro korrika.

Zapatuko lasterketan parte hartu zuen antzuolar bakarra Julen Garitano izan zen arren, ez da Antzuolako triatleta bakarra. Guztira, sei antzuolar ibiltzen dira Euskal Herriko duatloi eta triatloi lasterketetan, guztiak Antxintxika Debagoiena taldean; honako hauek, hain zuzen ere: Julen Garitano bera, Aitor eta Iker Larrea, Karlos Baleztena, Imanol Pildain eta Aitor Peñagarikano. Oraingo denboraldian ez dute lasterketa asko egin, baina nahiko postu onak egin dituzte: Peñagarikanok, esaterako, hamahirugarren bukatu zuen Barakaldoko duatloia; Aitor Larreak, berriz, bederatzigarren egin zuen Oñatikoan.

Hurrengo lasterketa Zarauzkoa izango dute antzuolarrek, bihar, zapatua.

LABUR

Uxue Arregik Euskadiko Gimnasia Erritmikoko Txapelketa irabazi du

Aurreko domekan, ekainak 8, jokatu zuten Gimnasia Erritmikoko Euskadiko Txapelketa Donostian. Gazte mailan, Uxue Arregi antzuolarrak irabazi zuen txapelketa; Maialen Toledo laugarren postuan sailkatu zen eta Iraitz Gastiain, berriz, bosgarren. Bina saio egin behar izan zituzten hirurek; uztaiarekin bata eta zintarekin bestea.

Kadete mailan ere izan genuen ordezkariarik: Maialen Legorburu antzuolarrak hartu zuen parte txapelketan, eta hirugarren postuan sailkatu zen. Hark ere bi saio egin zituen, mazoekin eta uztaiarekin.

Aurreko zapatuan hasi zituzten Peña Aiastuik antolatutako bizikleta probak

Ekainaren 7an egin zuten lehenengo bizikleta proba, erlojuz kontrako Iralarako igoera, hain justu. Hodei Arregi (03:30) infantila izan zen lehenengoa. Benjamin mailan, berriz, Jon Madariagak (05:19) irabazi zuen lasterketa. Bihar, zapatua, Uzarragako igoera jokatu dute eguerdian. Hilaren 21ean eta 28an, gimkana jokoa egingo dituzte Ondarren eta Zurrategin. Uztailaren 6an, azkenik, San Martzialerako igoera jokatu dute.

SUKALDEKO ALTZARIAK
Harizki

MUEBLES IGEA

Sukalderako eta bainurako altzariak
Altzari rustikoetan espezializatuak

DEKORAZIOA
ABAD
PINTURAK
ANTZUOLA
PAPER PINTATUAK

Jose Gomez Abad

Errekalde 6, 4-B.
Antzuola
943 76 60 19
943 76 60 43
Faxa:
943 76 60 19

INDUSTRI MANTENIMENDUA